

Hukuman terhadap pesalah rogol, serangan seksual kekal

Mahkamah Rayuan kekalkan penjara 16 tahun, lima sebatan terhadap Bolhasan Hashim atas kesalahan tersebut

Oleh Hafizah Abdul Hamid

KUCHING: Mahkamah Rayuan semalam mengekalkan hukuman penjara 16 tahun dan lima sebatan terhadap seorang lelaki yang merogol dan melakukan serangan seksual terhadap seorang gadis berusia 14 tahun ketika insiden berlaku.

Panel tiga hakim terdiri daripada Datuk Alwi Abdul Wahab, Datuk Ahmad Kamal Md Shahid dan K Muniandy sebulat suara menolak rayuan Bolhasan Hashim, 38, selepas mendapati rayuan itu tidak mempunyai merit.

Mahkamah berpendapat hukuman yang dikenakan adalah setimpal dengan kesalahan dilakukan.

Sehubungan itu, Mahkamah Rayuan mengekalkan keputusan Mahkamah Tinggi yang diputuskan Hakim Datuk Faridz Gohim pada 19 Februari 2025.

Pada 28 Februari 2024, Mahkamah Sesyen men-

jatuhkan hukuman penjara 22 tahun dan lima sebatan selepas mendapati Bolhasan bersalah atas dua pertuduhan merogol dan satu pertuduhan serangan seksual terhadap seorang remaja perempuan berusia 14 tahun ketika kejadian.

Bagaimanapun, Mahkamah Tinggi Kuching pada 19 Februari 2025 mengurangkan hukuman penjara kepada 16 tahun, manakala hukuman sebatan dikekalkan. Keputusan itu seterusnya dikekalkan lagi Mahkamah Rayuan semalam.

Pendakwaan kes semalam dilakukan oleh Timbalan Pendakwa Raya Atiqah Abdul Karim@Husaini manakala Bolhasan diwakili peguam bela Yayasan Bantuan Guaman Kebangsaan (YBGK) Simon Siah.

Bolhasan terdahulunya didapati bersalah atas dua pertuduhan merogol mengikut Seksyen 376(1) Kanun Keseksan, yang memperuntukkan hukuman penjara



HUKUMAN KEKAL: Bolhasan (kanan) diiring keluar dari kamar Mahkamah Rayuan selesai prosiding semalam.

sehingga 20 tahun dan sebat, jika sabit kesalahan.

Dia juga didapati bersalah melakukan serangan seksual di bawah Seksyen 14(b) Akta Kesalahan Seksual Terhadap

Kanak-Kanak (SOACA) 2017, boleh dihukum di bawah Seksyen 14 akta yang sama, yang membawa hukuman penjara sehingga 20 tahun dan sebatan jika sabit

kesalahan.

Bagi dua pertuduhan pertama, Hakim Mahkamah Sesyen Saiful Bahari Adzmi menjatuhkan hukuman penjara lapan tahun dan dua

sebatan setiap satu pertuduhan manakala untuk pertuduhan ketiga, penjara enam tahun dan satu sebatan.

Saiful juga mengarahkan hukuman penjara dijalankan secara berturut-turut dan Bolhasan harus menjalani kaunseling pemulihan menurut Seksyen 26 SOACA sepanjang penahanannya.

Selain itu, Bolhasan diperintah diletakkan di bawah pengawasan polis selama dua tahun serta-merta sebaik menamatkan hukuman.

Menurut pertuduhan pertama dan kedua, Bolhasan telah merogol mangsa pada awal November 2022 sekitar 12 tengah hari dan pada 10 November 2022 sekitar jam 5 petang di sebuah taman di Petra Jaya di sini.

Manakala pertuduhan ketiga, dia melakukan serangan seksual ke atas mangsa di sebuah kampung di Petra Jaya di sini sekitar jam 10 malam pada 10 November 2022.

Berdasarkan fakta-fakta kes, pada 7 Disember 2022,

mangsa telah dirujuk kepada seorang doktor selepas mengadu sakit di bahagian abdomen dan selepas ditanya oleh doktor mangsa memberitahu dia telah dirogol oleh Bolhasan.

Susulan kenyataan mangsa itu, doktor yang merawatnya membuat laporan polis untuk siasatan lanjut.

Pada hari sama, kakak mangsa juga membuat laporan polis selepas mangsa memberitahu kepadanya yang dia telah dirogol serta diserang secara seksual.

Laporan-laporan polis itu akhirnya membawa kepada penahanan Bolhasan pada 8 Disember 2022.

Siasatan yang dilakukan mendedahkan Bolhasan telah merogol mangsa beberapa kali pada November 2022 di sebuah taman di Petra Jaya di sini.

Kes itu menyaksikan tujuh saksi, iaitu dua doktor, mangsa, kakak mangsa dan tiga pegawai polis dipanggil ke tempat kejadian.